

समां - 12:25 hrs.

एह आकाशवाणी जम्मू ऐ, हुन तुस विजय बजाज कोला खबरां सुनो:-



खराब मौसम दे चलदे 6एं दिनें तगर स्थगित रौहने मगरा सालाना श्री अमरनाथ जी यात्रा अज्ज जम्मू थमां परतियै शुरु होई गई ऐ। अधिकारियें दस्सेआ जे 6 जहार शा मते श्रद्धालु भगवती नगर आधार शिविर थमां घाटी च बालटाल बेस कैम्प लेई रवाना होए। 19 जुलाई गी जम्मू-कश्मीर च लगातार बरखा ते खराब मौसम दे चलदे सुरक्षा गी ध्यानै च रखदे होई यात्रा गी आरजी तौरा पर रोकी दिता गेआ हा। अधिकारियें दस्सेआ जे 18में जत्थें च 6 जहार 2 सौ नतर श्रद्धालु अज्ज जम्मू थमां रवाना होए जिंदे चा इक जहार 470 महिला, 25 बच्चें ते चरंजा साधु शामिल न। एह जत्था 223 गड्डियें दे काफले च सख्त सुरक्षा बंदोबस्तें हेठ छड़ा बालटाल आधार शिविर लेई गै रवाना होआ।

NHW Reopens

रामबन जिले दे केई हिस्सैं च बड़्डे पैमाने पर पुर्नब्हाली आले कम्मैं दे बाद जम्मू-श्रीनगर राश्ट्रीय जरनैली सिड़क (NH-44) पर गड़्डियें दी आओ-जाई परतियैं शुरु होई गई ऐ। अधिकारियें दौनों पास्सैं दा सिड़कें थमां मलबा हटाने आला कम्म शुरु कीता हा, कीजे

पस्सियां पौने करी दौनें बक्खी दा गड्डियें दी आओ-जाई बंद होई गई ही ते जरूरी चीजें-
बस्ते गी लेई जाने आली केई सारी गड्डियां ते ट्रक बता फसी गेदे हे।

<><><><><><>

CM-IFFJK Curtain Raiser

मुख्यमंत्री उमर अब्दुल्ला हों आखेआ जे जम्मू-कश्मीर, फिल्म उद्योग कन्ने अपने ऐतिहासिक संबंधें गी परतियै कायम करने ताई तैयार ऐ। उ'नें इस गल्लै पर जोर दिता जे जम्मू-कश्मीर दा पैहला अंतराष्ट्रीय फिल्म महोत्सव, घाटी गी इक लोकप्रिय फिल्म निर्माण केन्द्र दे रुपै च स्थापित करने ते इसी आलमी स्तह पर फिल्म निर्माण दे क्षेत्र च इक टकोहदी पंछान हासल करने च मदद करोग। श्रीनगर च जम्मू-कश्मीर दे पैहले अंतराष्ट्रीय फिल्म महोत्सव 2026 दी शुरुआत कोला पैहले मुख्यमंत्री उमर अब्दुल्ला हों “परदा गोआइ” रस्म गी अंजाम दिता। उमर अब्दुल्ला हों कश्मीर दे सिनेमा कन्ने मजबूत संबंधें गी चेता करदे होई आखेआ जे इक समां हा जिसलै फिल्म शूटिंग दी पैहली पसंद कश्मीर गै हुंदा हा। उ'नें गलाया जे एह उत्सव जम्मू-कश्मीर दी सगोसार संस्कृति गी उजागर करने ते मकामी नौजवानें दे हुनर गी सशक्त बनाने च महत्वपूर्ण साबत होग।

<><><><><><>

Kathua Grid Stn.

जम्मू-कश्मीर सरकार नै कठुआ ग्रिड स्टेशन दा दर्जा बधाने लेई मंजूरी देई दिती ऐ-जेहदे कन्ने एहदी क्षमता 3 गुणा 50 MVA थमां बधियै 4 गुणा 50 MVK होई जाहग। एहदे

कन्नै जुड़े दे ढांचागत कम्मं दे विकास लेई तकरीबन 15 करोड़ 22 लक्ख रपे दी अंदाजन लागत औग। इस परियोजना दा मकसद खिते दे बिजली सप्लाई सरबंधी ढांचे गी होर मजबूत करना ऐ, तांजे बिजली दी बदधी मंग गी पूरा कीता जाई सकै ते बिजली प्रणाली गी होर मता भरोसेमंद बनाया जाई सकै। एहदे कन्नै ओवरलोड गी घट्ट कीता जाई सकोग ते कठुआ ते आले-दोआले दे इलाकें च लोकें लेई बिजली दी सप्लाई दे म्यार च सुधार कीता जाई सकै।

<><><><><><>

Rana –Nandi Chool

जलशक्ति मंत्री जावेद अहमद राणा होरें पुंछ जिले दी तहसील मंडी दे दूर-दरेडे नंदी-शूल इलाके दा दौरा लाया ते हाल च पस्सियां पौने करी ते चानचक्क हाईं करी प्रभावित परोआरें कन्नै मलाटी कीती जेहदे च केई लोकें दी जान चली गेई ते होर बड़ा मता नुकसान पुज्जा ऐ। मंत्री होरें इस मौके सौहगी परोआरें कन्नै मलाटी कीती ते उन्दे दुख-दर्द गी सुनेआ। उ'नें प्रभावत परोआरें गी एह भरोसा दोआया जे इस औखी घड़ी च सरकार उन्दे कन्नै खड़ोती दी ऐ।

<><><><><><>

E.D. Searches

माली नियम कायदे लागू करने सरबंधि निदेशालय ई.डी दे जम्मू आहले सब-ज़ोनल दफ्तरैं जंदे रोज जम्मू-कश्मीर ते पंजाब च केई थाहरें छापेमारी कीती। एह छापेमारी वीरवारें, पैहे

दे गैर-कनूनी लैन-देन पर रोक सरबन्धि 2002 बरे आहले कनून तैहत, जम्मू-कश्मीर ते पंजाब पुलस कश दर्ज मामले दे सिलसिले च कीती गई ऐ। एह जांच नशीले पदार्थे दे कारोबारिएं ते आतंकवादिये बशकार संड-गंड कन्नै जुड़े दे मामले दे सिलसिले च बी कीती जा'रदी ऐ। जारी इक प्रैस विज्ञप्ति मुजब जांच च पता लगगा ऐ कि पंजाब ते जम्मू-कश्मीर च बड्डे पैमाने पर आतंकवाद लेई रपेया पैहा उपलब्ध कराने लेई नशीले पदार्थे दे धंधे दा इस्तमाल कीता जा' रदा हा, जेहदे च केई सतहें पर बक्ख-बक्ख लोकें दी शमूलियत कन्नै बकायदा इक बड्डे गिरोह आहला लेखा एह कम्म कीता जंदा हा। एहदे च पंजाब च रौहने आहले हैंडलर सतनाम सिंह ते मनजीत सिंह उर्फ मान ते कश्मीर घाटी दे कुपवाड़ा जिले च नियंत्रण रेखा कन्नै लग्गदे इलाके दे बसनीक सफीर अहमद ते कतील अहमद शामिल हे। छापेमारी दौरान किश बैंक खातें बी फ्रीज कीते गेन, जिंदे च 49 लक्ख 90 जहार रपे जमा हे।



Machail Yatra Deferred

किश्तवाड़ दे डिप्टी कमीशनर पंकज कुमार शर्मा होरें जानकारी दिती ऐ जे “श्री मचेल माता यात्रा-2026” जेहड़ी अधिकारिक तौरा पर अज्ज शुरु होनी ही- खराब मौसम दे चलदे 27 जुलाई धोड़ी अगड़े पाई दिती गई ऐ। डी.सी. होरें आखेआ ऐ जे यात्रा, जिला प्रशासन आसेआ मौसम ते सुरक्षा दा पूरी चाल्ली कन्नै मुआयना करी लैने दे बाद गै शुरु कीती जाहग। उआं उ'नें आखेआ जे मंदरें दे पवित्तर कपाट अज्ज गै खोल्ले जा'रदे न। डी.सी. होरें गलाया जे यात्रा 28 जुलाई गी शुरु कराने दी मेद कीती जा'रदी ऐ पर ओहदे शा पैहले

मौसमी हालात दे पूरी चाल्ती हर पैहलू पर जांच करिये गे यात्रा ब्हाल करने दा फैसला लैता जाहग।

<><><><><><>

Weather

मौसम विभाग नै जम्मू-कश्मीर च अज्जै थमां 27 जुलाई धोड़ी अद्दे-दुब्बे तौरा पर बदल छाए दे रौहने ते प्रदेश दिएं टार्मी-टार्मी थाहें पर हल्की बरखा बरने दी पेशनगोई कीती ऐ। एह्दे परैंत 28 थमां 30 जुलाई धोड़ी परतियै बरखा बरने दे इमकान दस्से गे न। प्रशासन नै लोके गी सलाह दिती ऐ जे ओह सौहगे-सतर्क रौहन।

<><><><><><>

Prog. Announcement

आकाशवाणी दे प्रादेशिक समाचर एकांश जम्मू आसेया “करगिल विजय दिवस” दे सरबंथै च- औंदे ऐतवारें 30एं मिन्टें दा इक विशेष कार्यक्रम प्रसारित कीता जाग- जेदा विषे होग- “नमन ते सम्मान”. 26 जुलाई गी दपैहरी ढाई बजे प्रसारित होने आहले इस कार्यक्रम च स्हाड़े परोहने होगन- भारती सेना दे पूर्व कर्नल आर.के शर्मा- जेहड़े इस विशे पर अपने माहिराना विचार सांझे करगन। इस कार्यक्रम दी मेजबानी साहड़ी न्यूज एंकर श्रुति खजूरिया आसेया कीती जाग।

<><><><><><>